

四明叢書

張宗祥

正義曰朱注沽市皆買也恐不精潔或傷人也漢書
食貨志曰酒者天之美祿帝王所以頤養天年享食
求福扶衰養疾百禮之會非酒不行故詩曰無酒酤
我而論語曰酤酒不食二者非相反也夫詩據承平
之世酒酤在官和旨使人可以相御也夫子當周衰
亂酒酤在民惡薄不誠是以疑而弗食顏注云鄉黨
所說孔子齊之時也此卽邢疏所本皇疏答或問云
論所明是祭神不用詩所明是人得用意亦承齊時
而言也黃先生曰詩無酒酤我毛傳一宿酒謂之酤

是沽酒非酒之美者也沽如粗沽之沽市如市道交
有市於道之市衙賣者多敗惡詐飾之物沽市因爲
不美之稱鄭君於禮檀弓以爲沽也注云沽猶略也
於周官酒正注司兵注言功沽喪服傳言粗沽史言
鬻國賣友以鬻賣爲詐亦其類也漢書食貨志言詩
據太平之世酒酤在官曰有酒酤我孔子言周衰亂
酒酤在民而酤酒不食此王莽欺世之論其實市中
兼有美惡之物夫子不食其惡者耳周氏柄中曰曲
禮脯曰尹祭鄭注尹正也孔疏正謂自作之也脯自

作則知肉之所用也論語市脯不食言其不正也皇
邢二疏亦云脯不自作不知何物之肉故不食然不
知何物之肉亦正恐其不精潔非有二義也淮南說
林訓酤酒而酸買肉而臭然酤酒買肉不離屠沽之
家以詐應詐以譎應譎安望其能精潔哉

不撤薑食

注孔曰撤去也齊禁薑物薑辛而不薰故不去也

宋刻九經本撤作徹正字當作攷

正義曰朱注薑通神明去穢惡故不撤邢疏以齊必
變食至不多食統承齊時而言實本孔氏此注或疑

每食不去薑耗散精氣恐未必然攷之內則人君燕
食庶羞三十一物內有薑桂又爲熬捶之去其皽編
崔布肉屑桂與薑以酒諸上而鹽之又暇脩捶脯施
薑桂他不概用也檀弓曾子曰喪有疾食肉飲酒必
有草木之滋焉以爲薑桂之謂也是非有疾食肉薑
桂可不必用故孔注以齊時言齊則無不食肉也且
常食之內豕爲多酒與豕肉皆能生溼說文薑作疆
云禦溼菜也是薑與酒內爲宜本草云薑味辛性微
溫久食通神明去臭氣朱子以爲通神明去穢惡尤

於齊時精潔相宜事文類聚蔬菜門引孔子不撤薑食不多食而題云薑不多食連文言之義更圓矣蒙案薑本菜類連言之曰薑桂未有以薑而云食者也食曰疏食曰稷食曰菰食未有以食而連薑者也然則經云薑食者何也上下文皆言食不食所云薑食者食仍指上肉脯而言不撤薑三字略讀食字爲一句所謂飲酒食肉者必有薑桂草木之滋焉不撤薑食者謂酒肉不撤薑而食也內則殿脩爲熬必施薑桂屑而洒諸上夫曰施曰洒則其不多可知也不撤

而亦不多中和養生之道也

孔注云云疏曰云撤去也者字當作斲或借徹皇疏云除也云齊禁薰物者釋文薰作著邢本作葷云葷辛而不臭說文葷臭菜也葷辛而不臭故云不薰薰借字煮俗字玉藻注以葷爲葷及辛菜渾言之也

不多食

注孔曰不過飽也

正義曰閻氏百詩以不多食專指葷言不撤而亦不多卽上無量不及亂一例語也姚氏姬傳曰古者有度食之閻天子左達五右達五公侯伯於房中五大

夫於閣三士於坵一未知孔子之已有閣歟其坵也
歟凡食畢鼎食則徹於造脯醢葷菜則不徹廢以備
時食所以優尊者也孔子所廢者薑而已雖常廢而
以辛善散氣故不多食以衛生也儒者或讀不多食
與上不屬則說非矣聖人不憚食尙待記而後明乎
孔注云云疏曰皇疏多則傷廉故不多也江熙云少
所啖也朱注適可而止無貪心也皆與孔注意同而
微異孔云不過飽恐其過而傷生也

祭於公不宿肉

注周曰助祭於君所得牲體
歸則以班賜不留神惠也

御覽引公作君

二 月 三 日 南 齊 書 卷 五 十 五

約園刊本

正義曰皇疏謂孔子仕時助君祭也助祭必得賜俎
還卽分賦食之不得留置經宿經宿是慢鬼神餘也
戚氏偶談曰曲禮凡祭於公者必自徹其俎孔疏此
謂士助祭若大夫以上則君使人歸之案徹俎歸俎
不同當祭未徹俎時尸與主人主婦俎有司徹之臣
得獻之俎自徹之置於堂下及祭畢士自持歸大夫
以上君使人歸之然則此不宿之肉卽君使歸之俎
而郊牖不致亦指不歸俎言也時說直謂君所頒祭

肉不知臣助君祭自有所獻之俎肉卽所云賓俎也
蒙案祭肉所賅者廣周禮大宗伯以脰膾之禮親兄
弟之國大行人歸脰以交諸侯之福祭統下至輝胞
翟闇皆有所畀是祭必有惠頒賜必均不特歸賓俎
一事而已也

周注云云疏曰云牲體者皇疏謂隨臣貴賤以牲骨
體爲俎賜之祭統云凡爲俎者以骨爲主骨有貴賤
殷人貴髀周人貴肩凡前貴於後貴者取貴骨賤者
取賤骨貴者不重賤者不虛示均也

祭肉不出三日出三日不食之矣

注鄭曰自其家祭肉也過三日不食是褻

鬼神之餘也

正義曰皇疏謂家自祭也自祭肉多故許經宿但不得出三日朱注謂過三日則肉必敗而人不食之是褻鬼神之餘也但比君所賜胙可少緩耳戚氏謂此節皆指公祭言祭後尚有虞祭頒不能卽日至時已越宿矣豈容再留若家祭無多肉亦無多人何待三日蒙案戚氏以不宿肉爲賓俎以不出三日爲胙肉說與古注大異惟以此節爲皆指公祭似記者以下

三句申明上句不宿肉之意蓋宰牲在前期一日正祭一日爲第二日無論虞祭繹祭比頒賜已爲第三日若再留過宿則出三日矣肉將敗而人不食之是褻黷鬼神之餘所以不敢宿肉者爲祭肉不可出三日出三日而人將不食之也

鄭注云云疏曰旣言祭於公又言祭肉旣言不宿肉又言不出三日文似歧異故鄭君以公祭家祭分別言之也

食不語寢不言

正義曰朱注答述曰語自言曰言范氏曰聖人存心不他當食而食當寢而寢言語非其時也楊氏曰肺爲氣主而聲出焉寢食則氣窒而不通言語非其時也蒙案說文直言曰言論難曰語周禮疏發端曰言答述曰語詩于時言言于時語語疏云直言曰言謂一人自言也答難曰語謂二人相對也雜記三年之喪言而不語鄭注言自言已事也語爲人論說也是語與言大有區別皇邢二疏謂方食不可語語則口中可憎亦不敬也寢息宜靜若言則驚開於人故不

言也黃先生曰食時有須答述者俟下咽後徐答之則聲宣而語清不可口銜食物而與語也寢則不妨答語而人方靜臥或以自言驚之不可也此說較范氏楊氏爲切理近情臧氏鶴泉曰禮少儀小飯而亟之注云備見問也食時或有問不容不答然甯速於食不遽答此亦不語之證也蒙案士相見禮凡言非對也爰而後傳言注云爰安坐也傳言猶出言也若君問可對則對不待安坐是凡非對答而自發言必待安坐而後可而況在已寢之時此亦不言之證也

雖疏食菜羹瓜祭必齋如也

注孔曰齊嚴敬貌也三物雖薄祭之必敬也

釋文食音嗣又如字瓜古華反魯讀瓜爲必今從古皇本疏作蔬瓜作菰論衡祭意篇南史顧憲之傳皆引此爲孔子語

正義曰朱注古人飲食每種各出少許置之豆閒之地以祭先代始爲飲食之人不忘本也孔子雖薄物必祭其祭必敬聖人之誠也或問旣曰疏食菜羹矣而又以瓜繼之則不辭矣曰必祭則明無不祭之食也是朱子從魯論讀瓜爲必字然皇疏謂用麤食菜羹及瓜持此三物供祭刑疏謂疏食也菜羹也瓜也

三物雖薄將食祭先之時亦必嚴敬玉藻云唯水漿
不祭又云瓜祭上環知此三者雖薄亦祭先也是二
疏申孔從古論皆以瓜字絕句公羊襄公二十九年
傳注引論語又以瓜祭絕句楊鏡山先生謂證之玉
藻句讀自順禮雜記孔子言少施氏食我以禮吾祭
作而辭曰疏食不足祭也翟氏攷異謂據此及水漿
不祭瓜祭上環之文知此之專舉三物皆屬徵實非
泛漫連綴辭也疏食向有三說飯疏食章孔注以爲
菜食謂鬻食之和菜者也月令鄭注以草木之實爲

蔬食周禮太宰臣妾聚斂蔬材注云百草根實可食者引爾雅蔬不熟曰饌以證之然此下曰菜羹則不得以爲草木根實也皇疏以爲麤食意謂粗糲之飯也程氏瑤田通藝錄云凡經言蔬食者稷食也論語蔬食菜羹玉藻稷食菜羹二經皆與菜羹並舉則蔬稷一物可知疏言其形稷舉其名也故玉藻曰朔月四簋子卯稷食四簋者黍稷稻粱也稷食者不食稻粱黍也諸侯日食稻粱各一簋食其美者也朔月四簋增以黍稷豐之也忌日食稷者貶之飯蔬食也是